

A. BALÎ / 08.06.2009

**DI DÎROKÊ DE TEVKUJIYA LI ŞENGALÊ PÊK HATÎ
YA DI SERBORIYÊN EVLIYA ÇELEBÎ DE!..**

(1655-1656)

- I -

Di dîroka Kurdên Êzdî de li ser wan pir caran êrîş hatine kirin û şerên mezin di navbeynê Êzdî û dijminên wan de qewimîne! Li gelek ciyan jî komkujiyên (jenosît) mezin li ser Êzîdîyan pêk hatine. Komkujiyên herî mezin yên li Şengalê bûyî ji aliyê Osmanîyan ve pêk hatine. Ereb û Eceman jî hin caran êrîş birine ser Êzîdîyan. Lê Kurdên musulmanan jî, bi taktîk û alîkariya ordiya Osmanîyan, Êzîdî rehet nehîştine û mal û milkê wan pir caran talan kirine!

Her êrîşa neyaran bi berxwedanên Êzîdîyan hatine paşve xistin. Bi hemî zîlm û zordariya serdestan, Êzîdîyan ti caran stûyê xwe li ber wan xar nekirine! Di tevkujiyên bûyî de jî, mirina xwe ji destketina neyaran baştir dîtine û dema firset kete destê wan, xwe bi destê xwe kuştine û xwe teslîmî neyaran nekirine!..

Di şerê yek û yek de mêranî û jinxwasiya jinên leheng yên Êzîdîyan rûmeta Êzîdîyan ya herî qenc û bilind e! Di dîroka Kurdên Êzdî de, bi sedan bûyerên bûyî, ji vê gotinê re şahîd in!

Li rojhilata navîn û li Mezopotamyê civat û olên civatan pir hatine guhartin. Lê civata ku ol û eslê xwe wenda nekirî ya herî kevn Kurdên Êzdî tenê ne. Mirov dikane vê tesbîtê ji bo Kurdên Alewî Qizilbaş re jî bêje. Lê Kurdên Qizilbaş di sedsalên dîrokê yên dawî de, ew ketine bin tesîra musulmantiye. Her çiqas musulmanên sun'î, Qizilbaşên Alewî, wek Îslam nepejêrin jî, lê gelek Alewî, ew xwe nêzîkî Îslamiyê dibînin. Kurdên Êzîdî ne wusa ne. Ew na bi Kurdbûna xwe û bi ola xwe ya Êzdatiyê xwe serbilind û berz û bala dibînin. Gelo ma ya rast jî ne wusa ye?.. Ma ji hebûnê netewî yên bingehîn nehatin guhartin hêjatir li dinê çî heye?..

Bi lêkolînek piçûk ez dixwazim evra û pîrozîyên Êzdatiyê û tevkujîya Êzîdîyan ya heya roja îro hinek veşartî mayî, bi belgeyek dîrokî wê ronahîxim. Ew tevkujîya herî mezin ya ku li Çiyayê Sîncarê bûyî, ew kesê bi çavên çavên xwe tevkujî dîtî û bi pêncusa xwe jî nivîsandî, wê bi gotina wî pêşkêşî xwendevanan bikim. Navê ew berhema dîrokî „Seyhatnameya Evliya Çelebî“ ye. Wek di navê pirtûkê de jî, têt xuyakirin, nivîskarê ew berhema girîng Evliya Çelebî bi xwe ye. Bûyer bi çavekî dîroknivîs hatiye nivîsîn. Ji bo vê jî, tevkujîya dîrokî bi belgeya dîroknivîskarê wê demê hatiye tesbît kirin!..

Gelo Evliya Çelebî kî ye? Wî çî kar kirye û çî wextê û dema kîjan paşayî de jiya ye? Çawa bûye ku li Stenbolê dijiya ye û ew rabûye, çûye Çiyayê Sîncarê? Sîncar li kî derê ye? Ji lêkolînek wusa re pêwîste, pirs û bersivên wusa bêne şîrovekirin.

Ji „Şîngal, Şengal“ê re wê demê Osmanîyan „Sîncar“ digotine. Ew nava wek „Sancar, Sangar, Sîncar û Şîngal“ jî hatiye bi nav kirin. Îro li bakurê welat li pir ciyan navê wê „Sîncar“ e. Lê li başurê welat, ew nava her wek gotina Kurdî ya kevn wek „Şîngal“ maye.

Ewliya Çelebî di navbeynê salên 1611-1682 an de jiyaye. Li Stenbolê hatiye dinê. Navê bavê wî Derwêş Mehmed Zîllî ye. Ew hosteyê zîlan bûye û 117 sal jiya ye. Li gel bavê xwe, ew hînî xwendinê bûye. Di bîst saliya xwe de li dorberê Stenbolê geriya ye û wê demê de dest bi nivîsandina serboriyên xwe kirye. Di navbeynê salên 1635-1639 an de di nav enderûna Osmanîyan de perwerdeya xwe kirye û bûye sîpahî (leşkerê siwarî). Dema Siltanê Osmanîyan Murad IV. an de ketiye seraya Osmanîyan.

Pir salan berê li zanîngêhê mamosteyek min di derheqê Evliya Çelebî de wusa axaft: „Têt gotin ku Evliya Çelebî di xewna xwe de Hz. Muhamed li geliya Stenbolê di hundirê keştiyekê de dîtîye. Dema Peyamber dîtîye, ew pir coş û xiroş bûye! Ji nişkan ve bi xwe hatiye! Dema ku bêje „şefat ya resullulah!“ Wî bi şaşî gotîye „ Seyahat ya resullulah“ Paşê ew bûye seyah û dest bi gera xwe ya sê parzemînen (kita, kontînent) cihanê kirye! Pêşiyê de çûye Bursa, Îzmît û Trabzonê. Di sala 1645 an berê bi keştiyê daye girava di nav Behra Spî ya bi navê Gîrîdê (Kreter)...

Di hundirê pêncî salî de çûye Nems (Awisturya), Hîcaz, Misir, Sudan, Habeşistan û Daxistanê. Wî ciyên lê gerî û dîtî, çî bîhîstine û çî dîtine, baweriyên xwe jî hin caran bi çavên gerokan, hin caran

jî bi çavên dîroknivîsan tevê kirine û nivîsîne. Lê hin caran jî, bi gotinên hatin mezinkirî (gotinên fişalkirî) bûyer nivîsîne! Ew berhema ji bo danasîna sedsala 17 an, çavkaniyek herî baş û balkêş e. Di vê berhemê de mejû (dîrok), erdnîgarî (coxrefya), civaknasî (sosyolojî), netewe û teybetmendiyên netewan dayîn nasandine. Çi mixabin neyartiya wî ya ji Êzdiyan re heyî, ew ne neyartiyek awerte, bes ji bo wî tenê ye! Evliya Çelebî, Êzdiyan di bin bandora olê îslamê de wana wek ne mirov, wek jindarên bê tarîf dixwaze bide nasandin. Ew dîtina îslaman ya di derheqê Êzdiyan de heyî, heya şoreşa Kurdistanê destpêdike, wê hebûna xwe di nav Kurdên Îslam de jî parastiyê û her tesîra xwe ya ne baş her berdewam kirye! Di şoreşa Kurdistanê de, di nav hêzên pêşmerge û şoreşger de, Kurdên Êzîdî bi lehengiyên mezin, wana netewetiyaya Kurdî di çalakiyên xwe de nîşan dayîne. Bes ne tenê di aliyê mîrxwasî û lehengî de, di aliyê zanyarî de jî, li Sovyeta kevn Kurdên Êzîdî bi sedan profesor û doktor di nav xwe de derxistine. Wana jî perwerdebûna Kurdan li her perçeyan dane ser milên xwe û Kurd perwede kirine. Bi netewetiyaya ew Kurdên Êzîdî yên hêja bi milyonan Kurd fêrî netewetiyaya Kurdî ya hemdemî bûne! Wek tîrojên rojê, ew rewbenbîrên Kurd li seranserê welat ronahî belav kirine û îro jî ew karê nîştîmanperwer her berdewam dike...

Ez bawerim, di dîroka Kurdistanê de, qasî Kurdên Êzîdî, welat û nîştîmanperweriya Kurd ji aliyên Kurdên din ve jî bihata parastin, heya roja îro Kurdistanê azad bûya. Bi sedsalan Kurdên sun'î bi ordî û xelifeyên îslamê ve her tim hatî bûn girêdayîn. Dema Osmaniyan êrîş dibirin ser Kurdên Êzîdî, wê demê jî, Êzîdî bi serê xwe azad dijîn. Wan her dixwestin, wek dewletek Kurdan hebûna xwe biparêzin. Di nivîsa Evliya Çelebî de jî xûya dibe, ku wê demê Kurd li Çiyayê Sîncarê serbest bûne. Ew serbest bûna Êzîdiyan, Osmaniyan ji xwe re xetere dîtine! Ji bo vê ye, ku pir caran bi jimara sed hezaran ordî birine ser navçeya Sîncarê!..

Ew bûyera 355 sal berê li Çiyayê Sîncarê ya li ser Kurdên Êzîdî bûyî, zar û zêç negotîne, tev de kal û pîr, jin û mêrên Kurd bi dehezara qirkirine! Kurdên ku ji ber ordiya Osmaniyan xwe avêtine şikeftan, ew hemî bi komkujiyek hovane çawa ji ortê hatine rakirine, bi xwe pesindanek Osmanî ji aliyê Evliya Çelebî ve li pêş çavan tête rêxistin. Di ser ew bûyera hov re ewqas sal şunda, bûyerek wusa li Dersimê (1937-1938), di ser Kurdên Alewî re jî, Tirk ew hovîtiya xwe ya dîrokî bi barbariyek mezin dîsa dubere dikin. Bi hezaran Kurd wek Kurdên Çiyayê Sîncarê, di şikeftên Dersimê de bi jahrê hatine qetil kirin û paşê jî, deriyê şikeftan bi beton hatiye girtin. Mirovên di hundirê şikeftan de jindar mayîn jî, bi hovîtiyek ne mirovatî hemî hatine kuştin!..

Bêbextiya dîrokê ya li ser hemî Kurdan bûyî, bes bi ew du mînakên derbas nebûye ! Bi dehan, bi sedan komkujiyên curbecur li herêmên Kurdistanê yên cuda cuda li ser axa wan ya bav û kalan, di ser Kurdan re derbas bûne. Hovîti û qirkirinên li ser Êzîdî û Alewiyan bûyîn, di dema Sadam de li ser Kurdên Kurdistana başur yên Îslam re jî, carek din dubere bûye. Bi hezaran Kurd hatine kuştin û hatine wenda kirin. Ew tevkujiyên bûyî jimara Kurdên hatin qetil kirin, ew digîhîje sedhezaran! Ew komkujiyên bûyî ti caran bi ol û mirovetiyê ve nayen girêdayîn. Lê neteweparastin û oldariya Êzîdiyan ya bingehî, Êzîdî û Êzdatî li ser pêyan hîştîye!.. Di bin barê netewetiyaya Kurdî de, bi zirûfê şoreşgerî, Kurdên Êzîdî di dîroka Kurdistanê de karên kirin, ewna ti caran nayên bîrkirin!..

Ji îro pêde çî Êzîdî, çî Alewî û çî Kurdên îslam hemî di nav netewa Kurd de wek hev in. Lê mafê Êzîdiyan ya ku di dema borî de hatî bînpêkirin jî, pêwîste, ku em hemî Kurd bîrnekin! Ji bo ku dîrok carek din dubare nebe!..

Berhema Evliya Çelebî ya bi tîpên kevn ji deh bergan (cilt, post) pêk hatiye. Di navbeynê salên 1898-1928 heyst berg bi tîpên kevn, du berg jî, bi tîpên Latînî di navbeynê salên 1935-1938 an de hatine weşandin. Di navbeynê salên 1943-1951 an de beşên bijarte ji aliyê Reşad Ekrem Koçu ve ji berhemê hatine bijartin û ew wek du berg hatine çap kirin. Çendek nivîskarên din yên Tirk jî beşên bijarte wek du berg weşandine... Du bergên „Seyhatname“yê ji aliyê Hammer Narrative ve bi zimanê Îngîlîzî, bi navê “Of Travels in Europe-Asia and Africa, by Evliya Efendî“ li London, salên 1834-1850 an de hatine weşandin. Ji vê wergerê beşên ku naveroka xwe li ser Macaristanê (Ungar) bûn, ew jî, ji aliyê Karacson ve bi zimanê Macarî hatiye weşandin. Ew berhem ji bo dîroka Kurdistanê jî pir girîng e. Ji bo ku li Kurdistanê jî Evliya Çelebî pir geriyaye. Wî ciyên dîtin di berhema xwe de, bi agahiyên dorfîreh nivîsandine.

Têbînî: Di gotarek din de, ezê tevkujiya (jenosît) Çiyayê Sîncarê di „Seyhatname“ya Evliya Çelebî de, ya bi zimanê Osmanî bi tîpên kevî hatî nivîsîn, wergera wê ya wekxwe (orîjînal) bigîhînim xwendevanan.